




初唐四傑集
駱丞集
癸終

詩文知一考
十

土岐文庫
文庫17
W54
10



文庫 17
W54
10



駱丞集卷三

啓

和學士閨情詩啓

某啓學士袁慶隆奉宣教旨垂示閨情詩并序跪發珠
韜伏膺玉札類秦西之鏡照澈心靈同指南之車導引
迷誤竊惟詩之興作肇基邃古唐歌虞詠始載典謨商
頌周雅方陳金石其後言志緣情二京斯盛含毫瀝思
魏晉彌繁布在縑簡差可商畧李都尉鴛鴦之詞纏綿
巧妙班婕妤霜雪之句發越清迴平子桂林理在文外

駱丞集

卷三

叢雅居

昭和六十年二月一日
土岐善唐氏寄贈

010185191422

伯喈翠鳥意盡行間河朔詞人王劉爲稱首洛陽才子
潘左爲先覺若乃子建之牢籠羣彥士衡之藉甚當時
並文苑之羽儀詩人之龜鏡爰逮江左謳謠不輟非有
神骨仙材專事元風道意顏謝特挺戕伐典麗自茲以
降聲律稍精其間沿改莫能正本天縱明睿卓爾不羣
聽新聲鄙師涓之作聞古樂笑文侯之睡以封魯之才
追自衛之迹宏茲雅奏抑彼淫哇澄五際之源救四始
之弊固可以用之邦國厚此人倫俯屈高調聊同下里
思入態巧文隨手變侯調慙其曼聲延年愧其新曲走
以不敏謬蒙提及謹申奉和輕以上呈未追詠歌伏深
悚慙謹啓

上司刑太常伯啓

側聞魯澤祥麟希委質於宣父吳坂逸驥實長鳴於孫
陽是則所貴在乎見知所屈伸乎知己故雕其樸嶧山
有半死之桐賞其聲柯亭無永枯之竹伏惟太常伯公
儀天聳構橫九霄而拓基浸地開源控四紀而疏派自
赤文薦祉曲阜分帝子之靈紫氣浮仙函谷誕真人之
秀本支百代君子萬年道叶神交黃石授帝師之畧德

由天縱白星降王輔之精峯秀學山列三墳而仰止瀾
清筆海疏四瀆以朝宗登小魯之巖辨練光於曳馬臨
大吳之國識寶氣於連牛垂秋實於談叢絢春花於詞
苑辯河飛箭激流翻白馬之津文江散珠圓波漱驪龍
之穴是用德茂麟趾削桐葉以分珪道煥鶴池映桃花
而曳綬旣而揆留皇鑒忠簡帝心奉職春宮爍離光於
青殿代工天府明台曜於紫宸綜理元風燮調元氣含
輝禮閣皎愛日以流光毓彩文昌映德星而開照若乃
識度宏遠器宇疏通明允篤誠盛業隆於后土惠和忠

肅元功格於上天則伊陟謝其緝熙巫咸慙其保乂舉
才應器與士無私水鏡澄花炫金波於靈府冰壺澈鑒
朗玉燭於神機則鄧攸莫際其瀾盧毓罕窺其術故使
妍媸各安其分輕重不失其權五教克敷百揆時叙折
衝千里魯連談笑之功師表一時郭泰人倫之度加以
分庭讓士虛席禮賢片善經心揖仲宣於蔡席一言合
道接然明於鄭階某蓬廬布衣繩樞韋帶自弱齡植操
本謝聲名中年誓心不期聞達上則執鞭爲士王庭希
干祿之榮次則捧檄入官私室庶代耕之祿然而忠不

聞於十室學無專於一經退異善藏進殊巧宦擢羊角
而高翥浩若無津流驥尾以上馳邈焉難托實欲投竿
垂餌晦幽跡於涓濱抱甕灌園絕機心於漢渚幸屬乾
坤貞觀烏兔光華嵩山動萬歲之聲德水應千年之色
雖無爲光宅欣預比屋之封而有道賤貧恥作歸田之
賦於是揭來甕牖利見金門指帝鄉以望雲赴長安而
就日美芹之願徒有獻於至尊蟠木之姿誰爲容於左
右明公決幾成務論道經邦一顧之隆駘足逾於仙驥
片言之重魚目軼於靈蛇庶望顧兔離箕動薰風於舜
海從龍潤礎沛甘澤於堯雲削膾餘之魚希振鱗於吳
水膳後之豕翻化龜於魯津拜伏階墀增懼木谷謹啓

上李少常啓

竊惟陰陽作炭化一氣以陶甄天地爲爐混萬物爲芻
狗然則璧輪均照或流景於萊城玉燭平分獨翔寒於
黍谷是知汗隆迭襲榮悴相循得氣者繁滋失時者零
落伏以君侯疏乾激派龍門開竹箭之波鎮地橫基鵠
翅峙蓮花之嶺曜重暉於若月炳疊彩於非煙至若瑞
動赤符著元勳於東漢烽驚紫塞宣武功於北征奕葉

龍光蟬聯龜組德由天縱白星降王輔之精道叶神交
 黃石授帝師之畧故得三千運北擊舜海以遊鱗九萬
 圖南望堯雲而矯翰折衝千里魯連談笑之功師表一
 時郭泰人倫之度於是九重銜綬懸星彩於宸維四達
 埋輪振霜威於權石加以分庭讓士虛坐禮賢片善必
 甄揖虞翻於東箭一言可紀許願榮以南金某蟠木朽
 株散樗賤質牆面難用灰心易寒退無毛薛之交進乏
 金張之援塊然獨居十載於茲矣然而日夜相代笑溝
 壑之非遙貧病交侵思薜蘿而可託常欲乘幽控寂追

綺季於青山樂道棲真從魯連於滄海幸屬舜門廣闢
 漢幣交馳遂得佇嘯高邱應箕文而動韻聆吟大野浮
 良岫以流陰將恐在藻織鱗終寡登龍之望棲榆弱羽
 徒仰搏鵬之高所冀曲逮恩光資餘潤於東里襲承導
 引托輕葛一作於南樛 夢 柯 一作 撫已多慙循躬增懼謹啓

上兗州啓

側聞未遇孫陽鹽車無絕塵之迹時逢和氏荆山有連
 城之珍豈若聽清音於爨餘則枯桐發響收夜光於元
 璧則怪石騰輝在物猶然況於含識者乎伏惟明使君

鳳穴振儀龍門標峻瓊雕岳立表秀干雲霞煥霜霏澄
 虛鑿物既而代工天府忠簡帝心擁熊軾而撫百城建
 隼旗而臨千里坐棠敷惠恩纏去思剖竹垂仁式歌來
 暮清凝夜燭化警晨烏外勸九農內宏五教道之以禮
 樂齊之以刑書約法遵寬設蒲鞭之恥立言惟信控竹
 馬之期甘雨隨車雲低輕重之蓋還珠合浦波含遠近
 之星至如卧理稱難坐嘯匪易披裳問疾垂愛景以字
 人寧帷廣聽穆薰風而扇物嚴霜秋降叶隼擊而防小
 人零露春濡飾羔牲一作旌而禮君子於是仁必有勇吏

不忍欺美譽鬱於三齊芳聲騰於萬古若乃清規遠鏡
 皎月色於靈臺元鑑虛凝穆松風於智府研幾十籟探
 蹟九流縟翠萼於詞林粹仙花於筆苑文江翻浪織玉
 漱以韜霞學海驚瀾綴珠鱗於溜錦加以懸榻待士擁
 篲禮賢汲引忘疲獎題不倦懷經味道之客望範圍而
 駿奔兼一作兼包流略一作兼之夫窺義園以遐集求小善於
 毫芥顧正禮於二龍振幽滯於泥沙許公明以一驥某
 淹中故俗體樸厚之宏規稷下遺疇陶禮義之餘化頗
 遊簡素少閱縑緗每蟋蟀淒吟映素雪於書帳莎雞振

羽截碧蒲於翰池旣而學異懷蛟才非夢鳥價不齊於南漢芳不重於東山幸屬日月光華雲霞紛郁方結羨魚之網將謠扣角之詞奮短翮於搶榆希高標之餘拂濯織鱗於涓滴望鴻浪之微霑所冀顧盼曲流剪拂增價則鉛刀起一割之用跛鱉致千里之行是知竊混吹於齊竽濫飛聲於郢路抱山雞而自恧顧遼豕以多慙輕觸威嚴不遑流汗謹啓

上兗州崔長史啓

側聞豐城戢耀駭電之輝俄剖沙邱蹤迹躡雲之轡載

馳然則激湍侵星佩潛蛟於壯武騰鏢歷塊騁蹠駿於

咸陽且煦轍波鱗側羨鰲潭之躍觸籠雲翼肩望鵬隅

一作程

之迅是以齊郊夕唱牛歌採白石之詞漢境朝趨

車侯驚拂塵之思伏惟公騰瀾浴景溶靈派以含珠擢

榦捎雲翊孤巖而聳桂崇基疊秀匡霸道於周盟茂緒

聯輝贊文場於漢威偉龍章之秀質騰孔雀之後年叶

鳳彩於英姿辨蟾精於弱歲靈臺宏遠馳香練於霜鐔

册府幽深絢朝虹於壁渚心波湛漢泳矐魄於黃陂情

岳干天韜風雲於稽嶺龍津共濟競欣登御之車蕪室

欽賢必擁澄清之轡鬱文條而耀彩藻逸潘花蔚詞峰
 而銜奇光浮衛玉然則崑溪既琢必見山川之精樹羽
 已懸行嗣雲韶之響是以左龜陰而演化務肅百城輔
 麟壤以宣風恩覃千里徽猷克著逾盛德於休徵聲績
 聿宣軼英規於恭祖佩呂刀而邵美已贊拳帷之遊屈
 龐驥而未伸將騁仁風之駕加以側階引彥鑒馥子之
 微言倒屣延賓辨王生之雅量故使圓流之下探照乘
 於長波高岫之巔剖連城於幽石某瓶筭小器蠅蚊末
 材環一作斜帶嶧桐戢晞暘之厚德傍鄰汶篠慕貫時之

貞勁但以容膝一邱曲阜之瓢遽切枕肱五畝成都之
 壁已窮檐石厭於糟糠負薪疲於裋褐然而少奉過庭
 之訓長趨克己之方弋志書林咀風騷於七畧耘情藝
 圃偃圖籍於九流灑惠渥於羊陂屢泛文通之麥峻曲
 岸於鶯谷時遺公叔之冠雖不能縱逸韻於霜皋嘔野
 致九天之響而頗亦蓄餘香於露薄垂芬有十步之芳
 而乃而跡曾鴻非荆山之抵鵲筵名韓犬歎稽阜之陸
 梁方今玉瑄纏秋金風動籟吳宮歸乙望陰岫以依違
 素林返雁候陽潮而低舉籛金味道之子伴纁帛以彈

冠屑玉含毫之人望弓旌而翹足竊不揆於庸識輒輕
擬於揚庭所冀曲逮恩波時流咳唾儻能分其斗水濟
濡沫之枯鱗惠以餘光照霜棲之寒女得使伏櫪駑蹇
希騏驥而蹠足竄棘翩翮排鴛鸞而刷羽則捐軀匪恡
碎首無辭雖復投報楊金君子以之貽戒效誠魏草小
人之所懷恩輕瀆威嚴懼深履尾載塵聽覽迫甚蹈冰
謹啓

上齊州張司馬啓

昔者薛邑聞歌揖馮諼於彈鋏夷門命駕顧侯羸於抱

關何則志合風雲戴笠均乎乘馬情諧道術忘筌貴乎
得魚是以挹蘭言於斷金交蓬心於匪石庶清音動聽
賞流水於牙絃妙思通神叶成風於郢匠伏惟公疏源
白水浸地軸以輪波纂慶黃軒感星精而誕命綴珠華
於七曜聯玉葉於五雲至夫神石摘祥靈鈎表貺千年
騎鶴振仙駕於帝鄉七葉珥貂襲榮光於戚里因以紛
綸國牒昭晰家聲泊乎鹿走周原輔秦圖而興霸蛇分
沛澤翼唐運以開基常山之玉潤金聲博望侯之蘭
薰桂馥羽儀百代掩梁竇以霞舉鐘鼎一時罩袁楊而

岳立故得重規遠鏡湛月路以流清茂祉遐鋪架雲門
而擢秀英飛鳳穴藻五色以疑華穎躍龍泉涵九重而
毓潤風情疎朗霜明月湛之姿氣骨端嚴雪白冰清之
概若乃性符神授道擅生知挫三端於情峯一作鋒朝九
流於學海博聞強識辨晉國之黃熊將聖多能識吳門
之白馬言泉漱迴驚瀑布以飛瀾文江澹清含濯錦而
翻浪鬱槐市以增茂穆蘭室以流芳於是翔鱸應符觀
光上國飛龍成卦利見大人搏羊角以垂天展驥足而
騰景翼貳藩即紹敬祖之清廉光贊外臺陳君回之亮

直推公平而折獄礫鼠謝其嚴明擁端慤而字人化蛇
慙其智勇加以清規日舉湛虛照於冰壺元鑒露凝朗
機心於水鏡謙光自牧恭已愛人片善必甄揖虞翻於
東箭一言可紀許願榮以南金某疾抱支離材均擁腫
進不能握蘭分竹縮銀黃於雲臺退不能絕粒茹芝煉
金丹於地肺而出沒風塵之內淪漂名利之間游無毛
薛之交仕乏金張之援塊然獨處者一紀於茲矣然而
日夜相代恐溝壑之非遙貧病交侵思薜蘿之可託常
願處幽控寂追夏黃於商山樂道棲真從魯連於滄海

豈圖語默易爽心迹難逃題橋之恨愈深攀桂之情徒
結是用絕心乾沒耽閱邱墳謁子特於南荆訪康成於
北海西遊梁益仰司馬王揚之風東入臨淄慕淳于管
晏之智瞻言前古徒欲思齊俯惟當今空勞懷刺不意
雲浮礎潤霜落鐘鳴揖郭泰於仙舟有道斯在賞鑿明
於樽俎盛德猶存雖雅調清歌誠寡和於郢路而庸音
濫吹竊混奏於齊竽輕撮課囊揄揚盛德庶金波離畢
零陵之石自飛瑤光建寅蕭邱之火漸熱學慚麟角德
類鴻毛愧汗如漿憂心若厲謹啓

上廉使啓

每讀書見古人負米之情捧檄之操未嘗不廢書輟卷
流涕傷心何則情蓄於中事符則感形潛於內迹應斯
通而悅帝力以棲魂情欣養素仰皇華而暢慮敢用披
丹伏惟公源控玉輪激神濤而涵地基疏金闕架飛岵
以韜雲洎乎鹿走周原霸燕圖於卽墨蛇分沛澤封漢
爵於筆一作華城福祿攸鍾公侯必復炳靈丹穴襲吉黃
裳若乃峯秀學山列三墳而仰止瀾清筆海委九流以
朝宗登小魯之山辨練光於亂馬臨大吳之國識寶氣

於連牛垂秋實於翰林絢春花於文苑清規湛秀照月
旦而雕談素論凝元開夜光於妙辯旣而業成麟角引
茅茹而彈冠道暎鳳池絢桃花而曳綬揆留皇鑒忠簡
帝心列職春宮標離光於青殿代工天府明台曜於紫
宸故得龍綽垂光戢兩星而開照鶴蓋浮影翼五雲以
連陰某大塊流形小人餘慶幸河神入昴映白榆以流
祥江使負圖泛青蓮而薦兆薰風廣扇聖日揚輝進不
能高議雲臺談社稷之上務退不能銷形地肺揖箕顛
之餘芳而出沒風塵湮淪名利十年無棣萬里維桑旣

而日遠長安出蓬門而西笑雲飄吳會遡松浦以南浮
冀塵迹邱中絕漢機於俗網承歡膝下馭潘輿於家園
不悟地絡遐張維白駒於空谷天羅迴布弋黃鶴於高
雲顧已駑鉛並從媒銜力農賤事未免東臬之勞反哺
私情遽切南陔之詠少希顧復輒布悃誠雖噬指思歸
空軫倚閭之望而嚙臂求仕非圖高蓋之榮明公資孝
履忠恕已及物惟幾成務論道經邦庶顧兔離箕動薰
風於舜海從龍潤礎霑甘雨於堯雲則白羽書生自銘
恩於食稻黃裳童子將賽德於餐花拜手迴惶傾心肅

深謹啓

上瑕邱韋明府啓

側聞戢翮觸籠負垂天而跼影伏檄羈蹄望絕塵而踈足故以遊蓮遇綈悟宋王於嬰羅在藻迷波顧蒙莊於煦轍是以臨淄遣婦寄束緼於齊鄰邯鄲下客效處囊於趙相伏惟明府公締址瓊峯靈岳蔽丹青之景圖基珠溜神流沃清漢之波玉札飛文綜宏詞於楚傅金籥緝藝味雅道於扶陽孕蘭畹而生姿澧灞鍾高門之慶產銅溪而寫鐔荆藍資象德之禎幼辨羝羊演飛龍之

秘策夙談孔雀對家禽之麗詞赤野浮衒價之光珠胎瑩色丹穴培來儀之迅鳳彩含姿靈襟轉璧絢逸照於蘭池神府驚蘋韻清音於桂浦談叢散馥韞餘氣於九蘭筆海流濤駭洪波於八水縮銅麟句製錦鳧郊化洽下車恩孚攬轡德聲含詠仁風飄十地之雄道化編謠惠露灑三天之渥狎中牟之馴雉豈懼驍媒驚重泉之瑞鸞非關照舞雖則塵飛范甌垂銀有結綬之華而乃調理宓絃烹雞屈涵牛之量加以招攜白屋勸誘青衿遂使激流逸客望驥足以雲蒸棲泌遺才款龍門而霧

會某緯蕭末品拾艾幽人寓迹零壇挹危直之秘說託
 根磬渚戢戰勝之良圖幸以奉訓趨庭束情田於理窟
 從師負笈私默一作識於書林至於九流百氏頗
 探其異端萬卷五車亦研其奧旨將欲優游三樂負杖
 以終年棲遲一邱鳴絃而卒歲諒以糟糠不贍甘旨之
 養屢空簞食一作筭無資朝夕之歡寧展是以欣安陽之
 捧檄擬毛義之清塵思魯國之執鞭蹈孔邱之餘志屬
 以蚤秋應節雁序戒時颯金將露玉共清柳黛與荷緇
 漸歇實含毫振藻之際離經析理之期不揆雕朽之材

竊冀遷喬之路輒期泛愛輕用自媒倘荆璞無致於見
 疑夜光不逢於按劍則沈骸九死終望銜珠殞首三泉
 猶希結草載塵清矚跼影外慚昌瀆威嚴循心內駭謹
 啓

上郭贊府啓

側聞樞精嘯谷韻清瀨於驚蘋震德昇乾鑿元枝而布
 族一作暖雖涸鱗濡沫尚缺望於鯨波而決羽槍榆頗思
 遷於鶯樹伏惟公瓊基疊秀積珠構於三龍玉翰驚華
 煜瑤林於八桂仙飛有道滎河泛高尚之舟德驗通神

靈策動幽明之鏡產耶溪而濯質霜鐔廓豐匣之姿孕
 鍾嶺而飛華虹玉絢荆巖之氣松秋表勁翊頰霞而插
 極菊晚馳芳涵清露而炫沼鑒懸龍鏡明逸照於咸陽
 韻入鳧鍾驚洪音於長樂心源泛藻控鰲壑以朝宗情
 嶽披雲一作蓮掩崑一作龜岑而作鎮惠牛曜辯驚荀鶴於
 談叢揚鳳摛文詠鄒龍於筆海故佐銅章於磬渚側扇
 文鯨之風貳墨綬於桐郊讚誘祥鸞之化絃揮單父弼
 清韻於嵇琴化洽中牟翼馴翬於潘雉加以延賓置驛
 接士軼廬採拔芻蕘邁欽賢於司馬提獎幽滯軼取俊

於涪于某甕牖輕生席門賤品幸以參名比屋悅康衢
 以自娛預迹耦耕欣日出而知作又以家傳素業弋書
 林而騁志少奉庭幃踐文囿以漁魂至於白簡青緗頗
 測探其奧旨竹書石記亦幽求其邃原雖未能叫徹帝
 闈聲馳宰府而頗亦見推里閭譽浹鄉閭方今銀箭纏
 秋金壺應節吮墨翹足期筵迹於一枝味道彈冠望橫
 經於重席不量庸昧竊冀揚庭伏乞恩波暫垂迴盼倘
 使陳留逸調下探柯亭之篠會稽陰德傍眷餘溪之蔡
 則迴眸之報不獨著於前龜清亮之音誰專稱於往笛

馬孟集 卷三
雖滄溟遠量敢不愧於牛涔而嵩岱洪恩終曾酬於蟻
垤輕喧視聽憂讐惟深猥瀆階庭兢惶交集謹啓

上梁明府啓

昔者聞歌薛邑賞彈鋏於馮諼佇駕夷門揖抱關於侯
子豈惟成風之斲妙思通神流水之絃清音入聽況夫
志合者蓬心可採情諧者蘭味寧忘伏惟公儀天聳構
層基控射牛之峯浸地開源驚濤疏釣鰲之浦至夫封
侯廟食掩金許以霞舉三主八公罩袁楊而岳立於是
功超振鷺位典烹鮮水鏡澄瀾照翔鸞之舞影吟琴動

操叶馴雉之雅音既而盛德有鄰佐皇華而撫俗君子
不器扈輪軒以觀風某蒲石橘遷聲鄉蓬轉不叶十室
無專一經攀驥逸而無由仰鵬飛而自失公顧盼成飾
咳唾爲恩庶微潤於江波冀末光於鄰燭使幽禽遷木
侶丹山於帝梧鳴石在川應黃鍾於仙管敢布心也詎
能望焉謹啓

書

上吏部裴侍郎書

武功縣主簿某謹再拜書上裴公執事易曰書不盡言

言不盡意然則理存乎象非書無以達其微詞隱乎情
非言無以筌其旨僕誠鄙人也頗覽前事每讀古書見
高堂九仞曾參負北向之悲積粟萬鍾季路起南遊之
歎未嘗不廢書輟卷流涕沾襟何則情蓄於中事符則
感形潛於內迹應斯通是用布腹心瀝肝膽庶大雅含
宏之量矜小人惻款之誠惟君侯察焉某一藝罕稱十
年不調進寡金張之援退無毛薛之遊亦何嘗獻策干
時高談王霸銜才揚已歷抵公卿不汲汲於榮名不戚
戚於卑位蓋養親之故也豈謀身之道哉不圖君侯忽

垂過聽之恩任以書記之事擬人則多慙阮瑀入幕則
高謝郗超昔聶政荆軻刺客之流也田光豫讓烈士之
分也咸以勢利相傾意氣相許尚且捐軀燕趙甘死齊
韓今君侯無求於下官見接以國士正當陪磨後殿奉
節前驅賈餘勇以求榮效輕生而答施而顧逡巡於成
命躊躇於從事者徒以夙遭不造幼丁閔凶老母在堂
常嬰羸恙藜藿無甘旨之膳松楸闕遷厝之資撫躬存
亡何心天地故寢食夢想噬指之戀徒深歲時烝嘗崩
心之痛罔極若僕者固名教中一罪人耳何面目以奉

三軍之事乎況屬天倫之喪奄踰七月違膝下之養忽已三年而凶服之制行終哀疚之情未洩興言永慕舉目增傷夫怨於心者哀聲可以應木石感於情者至性可以通神明故徐元直指心以求辭李合伯陳情以窮訴上以棄興王之佐命下以全奉親之篤誠而蜀主不以爲非晉君待之愈厚此二者豈貪貧賤惡榮華厭萬乘之交甘匹夫之辱也蓋有不得已者哉人有乾沒爲心脂韋成性捨慈親之色養許明主以驅馳內忘顧復之私外存傳會之眷薄骨肉厚榮寵苟背恩而自效則君侯何以處之且義士期乎貞夫忠臣出乎孝子旣不能推心以奉母亦安能死節以事人雖物議之無嫌實吾斯之未信也況流沙一去絕塞千里子迷入塞之魂母切倚閭之望就令觀以卒歲仰南薰之不貲而使憂能傷人迫西山而何幾君侯情深錫類道叶天經明恕待人慈心應物倘矜犬馬之微願憫烏鳥之私情寬其負恩遂其終養則窮魂有望老母知歸再拜

與程將軍書

昨見武郎將備陳將軍之言恩出非常談過其實恭聞

嘉惠深用慚惶君侯懷管樂之才當衛霍之任豐功厚
利盛德在人送往事居元勳蓋俗智足以興王業道足
以濟蒼生尚且屈公侯之尊伸筦庫之士若下僕者天
地一無用芻狗耳粵自旌賁之辰卽逢聖明之歷材不
經務不能成佐命之功智不通時不能包周身之慮加
以天資木強不能屈節權門地隔蓬心不能買名時議
常願爲仁由已喪我於吾見機可以絕機無用之爲有
用隨時任其舒卷與物同其波流者矣其於木也曾般
無所措其鉤繩其於駕也伯樂無所施其銜策不悟聖

朝發明揚之詔君侯緝雍熙之道曲垂提獎廣借游揚
猥以樗櫟之資忝預賢良之薦當今鴻都富學麟閣多
英非游夏不可以升堂非夔牙不可以擊節倘片言失
德事暴區中匹夫竊議語流天下進乖得賢之舉退貽
薄德之譏恐不肖之軀爲高明之累耳必能一眴增價
九術先登燕昭爲市駿之資郭隗居禮賢之始則當效
駑鉛之用飾固陋之心陶鑄堯舜之典謨憲章文武之
道德上以究三才之能事下以通萬物之幽情將使詞
翰爲行已外篇文章是立身歧路耳又何足道哉言而

不慚者恃惠子之知我也所恨禁門清切造別無緣官
守牽纏風期有限某尙期辭滿尙泛孤舟萬里煙波舉
目有江河之恨百齡心事勞生無晷刻之歡嗟乎流水
不窮浮雲自遠霑襟此別把袂何時恃以平生之私忘
其貴賤之禮幸勿爲過謹不多談

答員半千書

張評事至辱惠書及詩把翫無厭慙如有叙上言離恨
下勛交情篤以猛風乾蘇之談彌以驟雨溼薪之喻雖
聞義則徙道存於起予而擬人失倫事均乎翫物借如
誠說蓋足下之不知言倘或劇談豈吾人之所仰望夫
鯤之爲魚也潛碧海泳滄流沈鰓於渤海之中掉尾乎
風濤之下而濠魚井鮒自以爲可得而齊焉鵬之爲鳥
也刷毛羽恣飲啄戢翼於天地之間宛頸乎江海之畔
而雙鳧小雁自以爲可得而褻焉及其化羽垂天搏風
九萬振鱗橫海擊水三千寧肯借翰於槍榆假力於在
藻資江濱涓流之水待堀堞揚塵之風哉故張子房之
達人也擊水搏風之適焉朱買臣之屈已也戢翼沈鰓
之致焉足下雅得古人之致不乏先賢之適自守莊筌

無嬰魏網亦寧不知在藻捨榆之力非擊水搏風之助
哉而詞旨殷勤深所未諭盍言爾志豈若是乎夫人生
百年物理千變名利寵辱之形立矣愛憎毀譽之迹生
焉其有道在則尊德成而上幽貞爲虛白之室靜默爲
太元之門知軒冕是儻來悟榮華非力致苟斯道之不
墜亦何患乎無成而欲圖僥倖於權重之交養聲譽於
衆多之口斯所以楊朱徘徊於歧路阮籍怵惕於窮途
嗟乎霜往露來歲華不待山高河廣離會無時桂樹寒
花公子去而忘返松巖春草王孫遊以不歸去矣員生
遠離隔矣音塵不嗣情其勞矣畏途窮谷靜躁殊矣惠
而好我無密爾音

與博昌父老書

雲雨俄別封壤異鄉春渚青山載勞延想秋天白露幾
遍光陰古人云別易會難不其然也自解攜襟袖一十
五年交臂存亡畧無半在張學士溘從朝露辟閭公倏
掩夜臺故吏門人多遊蒿里耆年宿德但見松邱嗚呼
泉壤殊途幽明永隔人理危促天道奚言感今懷舊不
覺涕之無從也過隙不留藏舟難固追惟逝者浮生幾

何哀緣物興事因情感雖蒙莊一指殆先覺於勞生秦
佚三號詎忘情於怛化啜其泣矣尚何云哉又聞移縣
就樂安故城廨宇邑居咸徙其地里閭阡陌徒有其名
荒徑三秋蔓草滋於舊館頽墉四望拱木多於故人嗟
乎仙鶴未歸遼東之城郭猶是靈烏代謝漢南之陵谷
已非昔吾先君出宰斯邑清芬雖遠遺愛猶存延首城
池何心天地雖則山河四塞是稱無棣之墟松檟千秋
有切惟桑之里故每懷宿昔尚想經過于役不遑願言
徒擁今西成有歲東戶無爲野老清談怡然自得回家
濁酒樂以忘憂故可洽賞當年相歡卒歲寧復惠存舊
好追思昔遊所恨企予望之經途密邇佇中衢而空軫
巾下澤而莫因風月虛心形留神送山川在目室邇人
遐以此懷勞增其歎息情不遺舊書何盡言

與親情書

風壤一殊山河萬里或平生未展或睽索累年存沒寂
寥吉凶阻絕無由聚洩每積淒涼近緣之官佐任海曲
便還故里冀叙宗盟徒有所懷未畢斯願不意遠勞折
簡辱逮埋淪雖未叙言慙如披面晚夏炎鬱並想履宜

又

某初至鄉閭言尋舊友者年者化為異物少壯者咸為
 老翁山川不改舊時邱隴多為陳迹感令懷古撫存悼
 亡不覺涕之無從也詢問子姪彼亦凋零永言傷情增
 以悲慟雖死生之分同盡此途而存亡之情豈能無恨
 終期展接以申潤懷取此月二十日栖桐一作成禮事
 過之後始可得行祇叙尚賒仰繫何極各願珍勸遠無
 所詮

駱丞集卷三

番禺沈葆和覆校

駱丞集卷四

序

秋日於益州李長史宅宴序

夫以五岳棲真杳渺清溪之上六爻貞

一作遁道一作寂

冥滄海之濱斯並激俗矯時獨善之風自遠懷材韞價
 兼濟之道未宏長史公元牝凝神虛舟應物得喪雙遣
 巢由與許史同歸寵辱兩存廊廟與山林齊致乘展驥
 之餘暇俯沈犀以開筵曲浦澄漪似對任棠之水茅一作
 芳亭興洽如臨山簡之池加以秋水盈襟寒郊滿望州

渚肅而蒹葭變風露凝而荷芰疎忘懷在真俗之中得
性出形骸之外雖四子講德已頌美於中和而五際陳
詩未形言於大雅爰命虛詛題其序云弁側山頽自有
琴歌留客操觚染翰非無池水助人盍各賦詩式貽樂
事

昌雨尋菊序

白帝徂秋黃金勝友辭塵成契昌雨相邀問涼燠則鴻
雁在天叙交遊則芝蘭滿室砌花舒菊還同載酒之園
岸葉低松直枕維舟之浦參差遠岫斷雲將野鶴俱飛

滴瀝空庭竹響共雨聲相亂仰折巾於書閣行閱飄颻
挹雅步於琴臺坐聞流水字中蚪蚪競落文河筆下蛟
龍爭投學海珠簾映水風生曳露之濤錦石封泥雨溼
印龜之岸泛蘭英於戶牖座接雞談下木葉於中池厨
烹野雁墜白花於溼桂落紫蒂於疎藤雖物序足悲而
人風可愛留姓名於金谷不謝季倫混心迹於玉山無
慙叔夜

晦日楚國寺宴序

夫天地交通忘筌蹄者蓋寡人間行樂共煙霞者幾何

羣賢抱古人之清風翫新年之淑景情均物我緇衣將
素履同歸迹混污隆廊廟與江湖齊致於時春生城闕
氣改川原聞遷鶯之候時行欣宦一作官侶見游魚之貪
餌坐悟機心加以慧日低輪下禪枝而返照法雲凝蓋
浮定水以涵光忘懷在真俗之中得性出形骸之外雖
交非習靜多慙谷口之談醉可逃誼自得山陽之氣詩
言志也可不云乎

餞宋三之豐城序

黯然銷魂者豈非生離之恨歟帝里天津槐衢分黑龍
之水巴陵地道楓江連白馬之門親友徘徊締歡言於
促膝故人樽酒掩離涕於交頤於時晚吹吟桐疑奏別
離之曲輕秋入麥似驚搖落之情白日將頽青山行暮
想姑蘇之地夕露沾衣望吳會之郊斷風飄蓋嗟乎歧
路是他鄉之恨溝水非明日之歡玉斗臨吳太阿之氣
可識金陵背楚小子之路行遙盍各賦詩式昭離緒

初春邪嶺送益府參軍序

分首三春送君千里青山白日非舊國之春秋翠犂清
尊是他鄉之杯酒況復圭峯南望切登高之情渭水北

流動臨川之嘆於時寒光將歇春景未華殘雪飄花猶
開六出輕冰涵鏡未解三川晨風軫孫楚之情歧路下
楊朱之淚雖載言載笑賞風月於離前一詠一吟寄心
期於別後詩言志也可不云乎

秋日餞麴錄事使西州序

麴錄事務切皇華指輪臺而鳳舉羣公等情敦素賞臨
別館而晷分促樽酒而邀歡望山川而起恨於時露團
龍隰雲斂雁天落葉響而庭樹寒殘花疎而蘭皋晚聞
秋聲之亂水已愴分溝對零雨之飄風倍傷歧路五日
之趣未淹蘭籍之娛二星之輝行照葱河之境清颯朗
月我則相思隴水秦川君方嗚咽行歌不駐遽驚班馬
之嘶贈言可申聊振飛魚之藻人探一字一韻一篇

贈李八騎曹詩序

夫人生百齡促膝是忘言之契丈夫四海交頤非贈別
之資然而想山川之遠遙送歸將遠惜歲華之不待行
樂無時是用輟征驂以少留敞離亭而多暇山芳襲吹
坐疑蘭室之中水樹含香宛似楓江之上加以御溝新
溜近入離絃賓館餘花遙催別酒旣而滎波東注灞岸

南登綠蟻傾而高宴終金馬一作絡一作落而離言促雖
 相思有贈終結想於華滋而素賞無睽盍申情於麗藻
 人爲四韻各賦一言

揚州看競渡序

夏日江干駕言臨眺於時桂舟始泛蘭棹初遊鼓吹咽
 江山綺羅蔽雲日嫵媚舞袖向綠水以頻低飄颺歌聲
 得清風而更遠是以臨波笑臉豔出浦之輕蓮映渚蛾
 眉麗穿波之半月靚粧舊飾此日增奇絃管相催茲晨
 特妙能使洛川迴雪猶賦陳思巫嶺行雲專稱宋玉凡

諸同好請各賦詩

秋日與羣公宴序

昔挂瓢隱舜蹈箕山而不歸解組逃齊泛滄波而長往
 咸用潛心物外擯影邱中豈若擬迹小山陶心大隱叶
 仲長之怡性偶潘岳之棲閒羣公或道洽忘筌契金蘭
 而貴舊或情深傾蓋披玉葉以交新於時玉女司秋金
 鳥返照烟含碧篠結虛影於鱗枝風起青蘋動波文於
 翼態庭榴剖實擊丹彩以成珠岸石澄瀾泛清漪而散
 錦旣而誓敦交道俱忘白首之情款爾連襟共挹青田

之酒不有雅什何以攄懷共引文江同開筆海

雜著

兵部奏姚州破逆賊諾沒弄楊虔柳露布

尚書兵部臣聞北極列象六合奉天子之尊南面乘乾
一統成聖人之業是知衣裳所會義有輯於殊鄰霜露
所均誠兼育於異類故塗山萬國誅後至者防風丹浦
一戎緩前禽者就日然則利弧矢以威天下法雷霆以
靖域中四時行焉天道不能去殺五兵備矣皇業所以
勝殘雖事切救焚苟順時以濟物恩深祝網不獲已而

用兵伏惟皇帝陛下登翠媽以握圖憲紫微而正象元
功不宰混太始以凝神至道無名佇華胥而得夢闡文
教以清中夏崇武功以制九夷環海十洲通波太液之
水鄧林萬里交影甘泉之樹反踵穿胷之域襲冠帶以
來王奇肱僂耳之酋奉正朔而請吏逆賊蒙儉和舍等
浮竹遺種沈木餘苗邑殊禮義之鄉人習貪殘之性日
者王明廣燭帝道遐融頗亦削左衽而被朝衣解椎髻
而昇華冕而豺狼有性梟獍難馴遂敢亂我天常化九
隆而背誕負其地險攜七部以稽誅騷亂邊疆跋黠州

郡是用三門授律長驅無戰之師五月渡瀘深入不毛之地去月二十一日軍次三肫崑崙鎮前後捕得生口知守捉山羌傍山連結十部蠻首徒五萬衆此山卽南郡中之巨防也岡巒千里西通大荒之郊溪谷萬重南極炎洲之境聳喬林而插漢

一作月

陰兔

一作靈

有假道之

標拔崇巖以隱天陽烏無迴翼之地峯危束馬路絕懸車賊踞臨岱之形負建瓴之勢徵風召雨蝟起蜂飛驅雜種以挺災封狐千里肆沈黎而作孽雄虺九頭臣以爲制敵以權柔遠者祇成於德教伐叛以義決勝者不

在乎干戈於是廣布朝恩恭宣帝澤申之以安撫曉之以存亡信重蠻陬無負黃龍之約賞隆漢爵不渝白馬之盟而地接冉駝詞屢殫於喻蜀俗通盤瓠聲不輟於吠堯臣遣左二軍子總管寧遠將軍前守右驍騎萬安府長史折衝都尉上柱國劉會基率檢校果毅驍騎尉并陘縣開國男劉元暎等銜枚遠襲卷甲前驅偃危旆而設潛兵疑從天落乘間道而掩不備若出地中又遣右二軍子總管明威將軍行右武衛翊府中郎將上柱國高奴弗率左武衛天水府折衝都尉張仁操等陟南

山之南衝其要害之路又遣左一軍子總管前右金吾衛翊府左郎將上柱國孫仁感率衛尉府右果毅都尉王文雅等陵北山之北絕其飛走之塗賊首領楊虔柳諾沒弄諾覽斯等振螳螂之力拒轍當輪縱蚊蚋之羣彌山滿谷劉會基高奴弗孫仁感等並忠勤克著知畧遠聞識明君之重恩輕生有地提太阿之神劍視死無時彎弧而兇黨土崩舉刃而妖徒瓦解雖危若沸鼎未窮梟首之誅救死扶傷猶致析骸之爨二十二日臣遣副總管兼安撫副使定遠將軍前左驍騎翊府中郎將

令狐知通率右武衛良將壯府左果毅都尉韓惠德等擁貔豹之雄順天機而左轉遣管內安撫副使朝議大夫使持節守銀州刺史上柱國宜春縣開國男李大志率前左武衛靜初府右果毅都尉上柱國陳宏義等驅象犀之卒乘地軸以右迴又遣行軍司馬朝散大夫守嵩州都督府長史上柱國梁待璧率守右金吾衛宜昌府果毅都尉閻文成等總投石拔距之材蹈中權而拊其背又遣前守右威衛龍西府果毅都尉康留買等騰躍鐵歛金之騎犯前茅而扼其喉臣等卒守左衛清宮

府左果毅許懷秀等橫玉弩以高臨縱金鉦而直進元
雲結陣影密西郊赤莖揮鋒氣衝南斗飛塵埃而布地
白日爲之晝昏積氛禊以稽天滄溟爲之晦色兵交刃
接鳥散魚驚自卯及申追奔逐北斬首千餘級轉戰三
十里激流膏而爲泉似變萋宏之血委亂骸而擠壑若
泛鼈靈之屍旣而照盡高春雲昏乙夜賊乃收集餘眾
保據重巖臣度彼遊魂慮其宵遁使三軍齊進四面合
圍二十三日乘魚爛之危啟蛇行之陣揚麾誓眾杖節
訓兵一鼓先登賞必懸於芳餌九攻失律罪無赦於嚴

誅五部雄材三河俠少或生居燕地尤工卽墨之圍或
家本秦人早習昆明之戰叱咤則江山搖蕩慷慨則林
壑飛騰舉鵬力以揚威耀犀渠而賈勇澄氛廓禊若夏
景之潰春冰滅迹掃塵若霜風之捲秋穽戰踰百里時
歷三朝前後生擒四千餘人斬首五千餘級諾沒弄楊
虔柳等殞元行陣懸首旌門蒙儉和舍等委眾奔馳脫
身鋌險雖復刑以止殺丁壯咸伏於誅夷禮不重傷班
白必存於寬宥昔魏臣賦蜀徒聞蒟醬之奇漢使開邛
纜通竹杖之利豈若膺紫泥而弔伐指丹徼以臨戎一

戰而孟獲已擒再舉而哀牢授首斯並皇威遠暢廟畧
遐覃奉元猷以配天徒知帝力掩皇輿而闢地豈曰臣
功無任慶快之誠謹遣某奉露布以聞軍資器械別簿
條上

兵部奏姚州破賊設蒙儉等露布

臣聞七緯經天星墟分張翼之野八紘紀地炎洲限建
木之鄉西距大秦雜金行而布氣南通交趾枕銅柱以
爲鄰俗帶白狼人習貪殘之性河淪赤虺川多風雨之
妖水積炎氛山涵毒霧竹浮三節肇興外域之源木化

九隆頗爲中國之患年將千紀代歷百王鄭純之化不
追孟獲之風逾煽故三年疲眾徒聞定笮之譏五月出
師未息渡瀘之役然則大人格一作拯物上聖乘期法乾

坤以握樞體剛柔而建極知仁義不能禁暴設刑網以
勝殘知揖讓不可濟時用干戈而靖亂伏惟皇帝陛下
祥摛戴玉拓地軸以登皇道契書繩掩天紘而踐帝元
雲入戶纂靈瑞於丹陵蒼籙升壇薦禎圖於翠渚垂衣
裳以朝萬國崇玉帛而禮百神昭儉防奢露臺惜中人
之產宣風布政明堂法上帝之宮致羣生於太和登品

物於仁壽四神踐雪玉老飛星君囿祥麟樂班文於仙
卉女牀鳴鳳韻歸昌於帝梧四隩同文五方異色鄧林
萬里纔疏苑囿之基曾城九重未出池隍之域六合照
臨之地候月歸琛大鑪覆載之間占風納賚蠶茲蠻貊
敢亂天常橫赤燁以疏疆背朱提而設險山林萬仞巖
邑千尋望秦阜以相傾峭陵失四塞之阻對梁山而錯
峙劍門成一簣之峯自謂絕壤遐方中外足以迷聲教
憑深負固江山可以逃靈誅不知玉弩垂芒泗水無九
嬰之沚瑤階舞戚洞庭有三苗之墟臣等謬以散材忝

專分閩自白招乘候順秋帝以揚旌絳節臨邊通夜郎

而解辯雲開雋穴旆轉邛川峻岐折坂之危盡忘襟帶

滇池漏

一作路

江之固曾莫藩籬唯逆賊設蒙儉等未革

狠心仍懷豕突陸梁方命旅拒偷生城接祠雞竟無希
於改旦山多神鹿終未息於擇音臣以大帝宣威有征
無戰明王仗順先德後刑加聖澤於中孚緩天誅於大
造庶南薰解慍仰雲闕以翔魂東律變音扣轅門而頓
顙而祝禽疎網徒開三面之恩毒虺挺災逾肆九頭之
暴乃鳩集餘衆蟻結兇徒儋耳椎髻之渠千里霧合鑿

齒雕題之孽一呼雲屯凌石菌以開營拒巖椒而峻壘
崇巒切漢若登藏寶之山絕壑憑霄似瞰封泥之谷以
去月十七日連營布陣踞險揚兵東西三十餘里馬步
二十餘萬聚蚊蚋而成響聲若雷霆縱蛇豕以爲羣氣
橫宇宙臣遣中郎將令狐智通等擁拔山超海之雄當
其步陣遣銀州刺史李大志等驅躍景騰雲之騎乘其
馬軍遣巋州都督府長史行軍司馬梁待璧等領勁卒
二千絕其飛走之路遣臨源府果毅馬仁靜等勒精兵
九百斷其潛伏之軍臣率行軍長史韓餘慶等負霜戈
而直進指雲陣以長驅庶令斬馘七擒戰士挾雷公之
怒伏屍百里蠻夷識天子之威於是三畧訓兵五申誓
衆先登陷敵無遺大樹之功后拒亂行必致曲梁之罰
楚人三戶蜀郡五丁氣擁元雲精貫白日暗鳴則乾坤
搖蕩呼吸則林壑沸騰列旗幟以雲舒似長虹之東指
橫劍鋒而電轉疑大火之西流刃接兵交洞曾達腋自
辰踰午魚爛土崩沸殘息於層峯更切守陴之哭積圓
顛於重阜殆成京觀之封唯賊帥夸千未悟傾巢之兆
敢懷拒轍之心獨率馬軍平一作憑川轉鬪驚塵亂起六

合爲之寢光殺氣相稽四溟由是變色副總管李大志
忠唯殉國義則忘軀臨危而貞節逾明制敵而神機獨
遠丹誠自守雖九死其如歸白刃交前豈三軍之可奪
投袂則妖徒霧廓舉旗而兇黨山崩於是乘利追奔因
機深入困獸猶鬪如戰廩君之魂窮鳥尚飛如驚杜宇
之魄斬甲卒七千餘級獲裝馬五千餘疋僵尸蔽野臨
赤坂而非遙流血灑途視丹徼以何遠首領和舍等並
計窮力屈面縛軍門寬其萬死之誅宏以再生之路唯
蒙儉脫身鋌險負命窮山顧巢穴而靡依逃晷漏而何

幾況妖徒革面徼外非復他人部落離心舟中皆爲敵
國瞻言梟首指日可期凡在歸降隨事招撫與之經始
復其故業首邱懷戀疑臨故國之墟安堵識家似入新
豐之邑然后班師遯水振旅禺山建鴻勳於武功暢元
猷於文教庶荒陬襲中原之禮邊疆息外戶之虞華封
祝堯兆皇基於千載夷歌頌漢美王澤於三章宜與夫
天帝前皇廣賜秦公之冊坤元益地遙開王母之圖蓋
亦有云曾何足紀斯並元謨廣運廟畧遐覃一戎而荒
景肅清再鼓而邊隅底定豈臣等提戈環甲克全百勝

之功仗節揚麾能通九變之利詣藁街而獻旅大帝成
規聞林杜以勞旋小臣何力不勝慶快之至謹遣行軍
司馬朝散大夫守嵩州都督府長史上柱國梁待璧奉
露布以聞軍資器械別簿錄上

爲齊州父老請陪封禪表

臣聞元天列象紫宮通北極之尊大帝凝圖元猷暢東
巡之禮是知道隆光宅旣輯玉於雲臺業紹禋宗必塗
金於日觀陛下乘乾握紀纘三統之重光馭辯登樞應
千齡之累聖故得河浮五老啟赤文於帝期海薦四神

奉丹書於王會瑞開三脊祥洽五雲旣而輯總章之舊
文紹辟雍之故事非煙翼馭移玉輦於梁陰若月乘輪
祕金繩於岱嶽臣等職均芻狗陰謝桑榆幸屬堯鏡多
輝照餘光於連石軒圖廣耀追盛禮於樅金然而鄒魯
舊邦臨淄遺俗俱沐二周之化咸稱一變之風境接青
疇俯識獲麟之野山開翠岵斜連辨馬之峯豈可使稷
下遺氓頓隔陪封之禮淹中故老獨奉告成之儀是用
就日披丹仰璧輪而三舍望雲抒素叫天闈於九重儻
允微誠許陪大禮則夢瓊餘息仰仙闕以交懽就木殘

馬云集 卷四
二 鄒氏刊
魂遊岱宗而載躍

策三道

問岱岳遊魂入佳城而怛化瀛洲羽客竦鶴轡而輕舉
雖則備於縑素昭晰可觀求諸耳目虛無罕驗棄杖成
龍有異虞翻之旨銜恩結草寧符宗岱之言二者何從
爾其揚權

對遐觀素論眇覲元風惟鬼惟仙難究難測至夫滕公
長往佳城開白日之徵洪崖不歸層邱控紫雲之蓋或
崇成蒼狗自是趙王之神道叶赤龍爰通陸安之治玉

壘變萑宏之血金闕化浮邱之靈固能目覩桑田來作
西王之使魂遊蒿里還爲北帝之臣然而將聖生鄒本
忘情於語怪多材封魯亦默論於通仙泊乎大義旣乖
斯文將墜於是八儒三墨之道異軫分馳九流百家之
文殊途競爽語仙則有無交戰語鬼則虛實相紛遂使
結草抗軍爰乖宗岱之論化竹遊水有異虞翻之言然
而博訪古書緬尋曩冊徇其浮說徒有奔競之談求諸
至言抑匪通經之旨何則高明瞰室已著六爻之文太
虛游形式編三洞之錄故齊君出獵遇豕啼於貝邱周

嗣登仙浮鶴軒於洛浦況乎干寶碩德已輯搜神之書
劉向通儒非無列仙之傳斯皆實錄諒匪虛談謹對

問士農工商四民各業廢一不可取譬五材而闕里致
言鄙於學稼漆園起論爰稱絕機豈先聖垂文義有優
劣將隨方設教理或變通者哉汝其大一作陳用啟前

感

對出震登皇垂衣裳而馭錄乘乾踐帝順舒慘而字氓
莫不列九土以開疆因四人而安業故農為政本兩漢
舉力田之勤財用聚人九市列惟金之利陟龍門下就

日入仕彈冠斲蟬翼以成風追工運斧咸用因人成事
隨利濟時蓋五帝通規三王茂範然則泣麟上聖訓三
千以領徒夢蝶幽人搏九萬以齊物欲使邱門志學折
以問農之言漢渚絕機抒以灌園之巧斯乃變通權教
趨舍適宜當今海內乂安天下樂業士食舊德農服先
疇自可孫宏獻書以待公車之制王丹載酒時慰田家
之勞謹對

問四十強仕七十懸車著在格言存諸甲令然則顏駟
韞價殆乎白首和尊播美始自齠年欲使滋泉之彥必

鄒氏刊
臻洛陽之才無捨則隄防或爽襟帶徒施其道如何佇
聞嘉答

對竊聞大人有作義佇良材貞士徇名理資明主是知
君必待士士必待君故使飛龍在天聖智有賢明之佐
巨魚縱壑元后得唐虞之臣然則否泰或爽材運難并
歲漸懸車尚牧淄原之豕年甫志學且珥漢庭之貂是
知因藉時來和君播元齟之俊當其未遇顏生致白首
之勤語其古今稽之運會雖則人事抑亦天時當今乘
六御天得一居帝翹車獵彥束帛旌賢故叢桂幽人罷

韞真於文豹青蓮江使自裂兆於非熊豈止洛陽之才
來儀漢國滋泉之叟降止周朝而已哉某談乏二龍識
迷三豕徒以鑽木輕焰仰昇扶而曜輝化草餘光對含
桂而炫彩迴皇如失俯仰多慙謹對

代徐敬業討武氏檄

偽臨朝武氏者性非和順地實寒微昔充太宗下陳曾
已更衣入侍洎乎晚節穢亂春宮密隱先帝之私陰圖
後庭之嬖入門見嫉蛾眉不肯讓人掩袂工讒狐媚偏
能惑主踐元后於翬翟陷吾君於聚麀加以虺蜴爲心

豺狼成性近狎邪佞讒害忠良殺子屠兄弑君鳩母神
人之所共疾天地之所不容猶復包藏禍心竊窺神器
君之愛子幽在別宮賊之宗盟委以重任嗚呼霍子孟
之不作朱虛侯之已亡燕啄皇孫知漢祚之將盡龍漦
帝后識夏庭之遽衰敬業皇唐舊臣公侯冢子奉先帝
之遺訓荷本朝之厚恩宋微子之興悲良有以也桓君
山之流涕豈徒然哉是用氣憤風雲志安社稷因天下
之失望遂四海之推心爰舉義旗以清妖孽南連百越
北盡三河鐵騎成羣玉軸相接海陵紅粟倉儲之積靡

窮江浦黃旗匡復之功何遠班聲動而北風起劍氣衝
而南斗平暗鳴則山岳崩頽叱咤則風雲變色以斯制
敵何敵不摧以斯攻城何城不克公等或居漢地或叶
周親或膺重寄於話言或受顧命於宣室言猶在耳忠
豈忘心一坏之士未乾六尺之孤何託倘能轉禍爲福
送往事居共立勤王之勳無廢大君之命凡諸爵賞同
指山河若或眷戀窮城徘徊歧路坐昧先幾之兆必貽
後至之誅請看今日之域中竟是誰家之天下

應詰

余以三伏時行至七里灘此地卽新安江口也有嚴子
陵釣磯焉澄潭至清洞澈見底往往有羣魚戲歷如行
空中人有釣者試取餌投之或有浮而不顧者或有貪
而輒吞者引竿而舉因以獲焉其始出也乃掉尾揚鬐
有若恃力而自免其少退也則鼓腮濡沫有似屈體而
求哀嗟乎勢牽於人道窮於我將欲以下座而歌馮子
又安能中轍而呼莊周哉余乃祝曰猛獸搏也拘於檻
穿鷲鳥攫也繫於樊籠素龜靈也被髮河津白龍神也
挂鱗置網何不泥潛而穴處何故貪餌而吞釣乎於是

放之江流盡其生生之理時同行者顧詰余曰夫至人
之處世也擬迹而後投隱心而後動終始不易其道侮
吝不生其情而吾子沈緝於川登魚於陸烹之可以習
政術羞之可以助庖厨曩求之將何圖今舍之將何欲
余笑而應之曰聖人不凝滯於物智士不推移於時知
幾之謂神養生之謂道殷王聖也囚於夏孔邱賢也畏
於匡且夫明哲之賢尚罹幽憂之患况鱗羽之族能無
弋釣之累哉故曩吾有心也恐求之不得今吾無心也既
得之而舍求與舍不亦雙美乎烹與羞不亦兩傷乎况

療飢者半菽可以充腹爲政者一言可以興邦亦奚必
因小鮮而後明三異之規勦大命而後冀一餐之飽擒
而不殺不可謂仁乎獲而不饗不可謂廉乎且夫垂竿
而爲事者太公之遺術也形坐磻溪之石兆應滋水之
璜夫如是者將以釣川耶將以釣國耶然後知古善釣
者其惟太公乎又有妙於此者其惟文王乎夫文王制
六合爲鈎懸西伯爲餌筮之於清廟投之於巨川一舉
而獲太公再舉而登尚父由此觀之蹲會稽而沈牯者
鮑肆之事也踞滄海而負鰲者漁父之事也斯並眇小
者之所習安知丈夫之所爲哉

自叙狀

伏奉恩旨令通狀自叙所能某本江東布衣也幸屬大
鑪貞觀合璧光輝易彼上農叨茲下秩於今三年矣然
而進不能談社稷之務立事寰中退不能掃丞相之門
買名天下徒以黃離元吉白賁幽貞沐少海之波瀾照
重光之麗景雖任能尙齒載宏進善之規而觀過知人
異降自媒之旨是用披誠瀝懇以抒愚衷若乃忘大易
之謙光矜小人之醜行彈冠入仕解褐登朝飾懷祿之

心效當年之用莫不徇名養利勵朽磨鉛自謂身負管樂之資志懷周召之業若斯人者何勝道哉而修譽察能聽言觀行捨真筌而擇士沿虛談以取才將恐有其語而無其人得其賔而喪其實故曰知人不易人不易知抑又聞之知臣莫若君知子莫若父誠能簡材試劇考績求功觀其所由察其所以臨大節而不可奪處至公而不可干冀斯言之無虧於從政乎何有若乃脂韋其迹乾沒其心說已之長言身之善覲容冒進貪祿要君上以紊國家之大猷下以瀆狷介之高節此凶人以

爲恥況吉士之爲榮乎所以令銜其能斯不奉令謹狀

祭趙郎將文

代李義作

惟靈降精辰象委質昌期棄筆文場早徇封侯之志影纓武帳坐昇戎秩之榮屬滇浦挺妖昆明習戰應星文而動將奉天罰以揚威不能宏妙算於五戎叶神謀於九變致令王師失律兇狡憑陵雋穴南臨同五溪之深入邱關北阻類雙嶠之不歸亭候多虞故有負於明代春秋責帥豈無慚於幽途夫任賢與能明君之事也陳力就列忠臣之義也雖見危授命固誠節之有餘臨難

權機何智謀之不足嗚呼哀哉某猥以散材謬專分閭
途經夷落路踐戎場停疲驂於九原悲來有地痛遺骸
於四野泣下無從暫輟征旅之勤爰崇掩骼之義庶幽
靈有託梧邱息入夢之魂壯士不還薤歌起送終之曲
嗚呼九真邊徼萬里長安城危踈勒山峻皋蘭因原為
隴卽壤成棺夕陰曦而平蕪晦秋風急而荒戍寒哀哉
異域幽挺但有新栽松柏他鄉古木非復舊邑枌榆感
平生其若斯聊申素酒儻聰明之不昧式薦篚醪

駱丞集卷四

番禺黃濤初校
番禺沈葆和覆校

